

## 42

## PSALM 42

T T Cloete

Heer, ek smag na U wat le - we  
soos 'n dier na wa - ter smag.  
Ek wil my na U be - ge - we.  
Heer, hoe lank moet ek nog wag?  
Tra - ne stort ek dag en nag;  
heel - dag word ek uit - ge - lag:  
"Staan jou He - re jou nie by nie?  
Sien jou God jou dan nie ly nie?"

- 2 Met verlange *dink* ek daaraan:  
Vroeër het ek opgetrek  
– in *die* skare was ek vooraan –  
op *na* die aanbiddingsplek,  
op *na* Sion, God se huis,  
jubelend met feesgeruis,  
Hom geloof met lofgesange –  
daaraan dink ek met verlange.

Teks: T T Cloete 2001

Melodie: *Ainsi que la biche rée* - Loys Bourgeois, Genève 1551; Lausanne 1565

- 3 *Waarom twyfel, waarom kerm ek,  
waarom is ek so oorstelp?  
Loof die Heer, Hy sal my optrek,  
uit bedruktheid my weer help.  
**Hoe neerslagtig ook, ek weet:  
Tot my hulp is Hy gereed;  
en hoe diep ook neergeboë,  
op my God rig ek my oë.***
- 4 *Van die Hermonkruin en -hange,  
uit die streek van die Jordaan,  
roep ek U in my verlange,  
diep bedruk, o Here, aan.  
Daar sal ek na U bly kyk  
wat u trou selfs snags laat blyk.  
U, die Here van my lewe,  
sal my nooit in druk begewe.*
- 5 *Waarom, Heer, moet ek gebuk gaan  
as die vyand my bespot,  
waarom moet ek, Heer, bedruk staan  
as gevra word: "Waar's jou God?"  
**Hoe neerslagtig ook, ek weet:  
Tot my hulp is Hy gereed;  
en hoe diep ook neergeboë,  
op my God rig ek my oë.***